

REGIONAL NEWS

HEADLINES:-

1. ZORO chuan Union Home Minister Amit Shah hnenah hmun hrang hranga awm Zofate chungchang an thlen.
2. Mizoram sorkar enkawl middle school 5 chu zirtirtu awm si a zirlai nei lo an ni a, sikul 21-ah zirlai ai-in zirtirtu an tam zawk.
3. NCB-in Imphal leh Guwahati zone-ah Methamphetamine, cheng vbch 88 hu an man.
4. North Macedonia-a nightclub pakhtata kangmei chhuakah mi 50 chuang an thi.

<><><>

ZORO

Zo Re-Unification Organisation (ZORO) chuan Union Home Minister Amit Shah hnenah Manipur State a Zofate'n inrelbawlina hrang an neih theih nan leh Myanmar ramri a zalen taka inkalpawhna leh ramri hung chungchangte an thlen.

ZORO hruaitute chuan nimin khan Aizawl Raj Bhavan-ah Amit Shah hmu-in Zofate tana pawimawh hrang hrang ziakin an thlen a. Manipur state a Zo hnahtlak leh Meitei inkara buaina awm chungchang-ah Zofaten harsatna an neih thu leh Manipur state chhunga Zofate leh Meitei te chu administration khatah awm ho a harsat tur thu te leh Zofaten inrelbawlina hrang (separate administration) an neih theih nana hma la tura ngenna thlen a ni. Union Home Minister hnenah hian hun rei tak lo hman tawh Myanmar nena ramri a zalen taka intlawn pawh theihna free movement regime (FMR) chu tihtawp a ni a, ramri paltlang tumte tan ramri kaltlang phalna a phutna chu India chuan January ni 1,2025 khan a hmang tan a. He dan hian harsatna nasa tak a thlen a, hemi chungchang ngaihtuah nawn leh a, FMR chu dan pangngai a kalpui leh turin ngen a ni a. ZORO hruaitute hian India sorkarin Indo-Burma ramri hung a tum chungchang-ah Indo - Burma border hung a nih chuan a chhehvel a cheng indigenous people-te'n harsatna nasa tak an tawh tur thu te, unau inthendarhna a thlen tur thu te, indigenous people te tan zalen taka inkal pawh chu UNO in kan dikna chanvo min pek a nih thu te thlen a ni bawh.

<><><>

ASSEMBLY

Assembly inkhawm kal lai mekah naktuk hian minister pahni Pu C. Lalsawivunga leh Pu Lalnghinglova Hmar te department enkawlina tur sum ruahman chu ngaihtuaha pawm tum a ni ang.

Ni 3 lai an chawlh hnu-ah naktuk Thawhtanni chawhma dar 10 leh a chanve atangin Assembly inkhawm chu chhunzawm leh a ni dawn a. Darkar khat chhung zawhna leh chhanna hun hman a nih hnu-ah MLA te hlawn leh pension chungchanga dan siam thatna tur duan lawk, The Mizoram Salaries, Allowances and Pension of Members of the Legislative Assembly (Amendment) Bill, 2025 chu parliamentary affairs minister Pu Vanlalhlana'n House-ah a pharh ang a. He dan siamthatna tura rawtna hi

MLA te hlawh tihpun emaw tihtlem emaw lam ni lovin dan ding lai tlema her remna mai tur a nih thu dawn a ni. He mi hnu hian Pu C. Lalsawivunga enkawl department 4, local administration, art & culture, district council and minority affairs leh animal husbandry & veterinary te sum hman tur ruahman cheng vaibelchhe 977 nuai 44, sing 9 leh sang 7 bakah Pu Lalnghinglova Hmar enkawl department 3 - excise & narcotics, sports & youth services leh Labour, Employment, Skill Development & Entrepreneurship atana sum ruahman cheng vaibelchhe 113, nuai 95, sing 7 leh sang 5 te chu house pawmpui turin pharh a ni ang a. Sawiho hnu-ah Thawhtanni vek hian pawm tum a ni ang.

Tuna assembly inkhawm (budget session) kal mek hi February ni 19 atanga tan a ni a, March ni 20 thleng awh tura duan lawk a ni a. March ni 4 a finance changtu chief minister Pu Lalduhoma'n assembly a tangka kum thar (2025-2026) atana Mizoram sum ruahman cheng vaibelchhe 15,198 leh nuai 76 chu March ni 20 khian pawm fel hman tur a ni a. Kumin tangka kum kal lai mek (2024-2025) chhunga sum dil belhna leh a behbawm dang, supplementary demand for grants cheng vaibelchhe 3,512 leh nuai 33 chu March ni 5 khan assembly hian a lo pawm tawh a ni.

<><><>

MIDDLE SCHOOLS

Mizoram sorkar enkawl middle school 5 chu zirtirtu awm si a zirlai nei lo an ni a, sikul 21-ah zirlai ai-in zirtirtu an tam zawk.

MNF member Pu Ramthanmawia zawhna school education minister Dr. Vanlalhlana'n ziaka a chhanna atanga a lan dan chuan zirtirtu awm si, zirlai awm lohna middle school hi 5 awmin middle school 21-ah zirlai ai-in zirtirtu an tam zawk a. Middle school 13-ah chuan zirlai leh zirtirtu awmzat a inzat bawk a ni. Lawngtlai district-ah zirtirtu awm si a zirlai awm lohna sikul a awm lo chungin zirlai awmzat ai a zirtirtu tam zawkna middle school 6 a awm a, sikul 5-ah zirtirtu leh zirlai an inzat chiah a ni. Mamit district-ah chuan middle school 6-ah zirlai aiin zirtirtu an tam zawk a, Luimawi middle school-ah zirtirtu leh zirlai 8 ve ve an awm. Lunglei district-ah chuan Thehlep upper primary school (SSA enkawl)-ah zirtirtu 2 awmin zirlai an nei lova. sikul 3-ah zirlai ai-in zirtirtu an tam zawk a, Chhumkhum upper primary school (SSA enkawl) bakah Dinthar comprehensive elementary school leh Hmuntlang middle school (SSA)-ah te zirlai leh zirtirtu awm an inzat chiah a ni.

Kolasib district chhungah Lenhmuikawn upper primary school (SSA)-ah zirlai awm lo chungin zirtirtu 3 an awm a, Zotlang upper primary school (SSA)-ah zirlai nei lovin zirtirtu 4 an awm bawk a. South Chhimluangah zirlai pakhat chauh zirtirtu 7 in an enkawl a, Zodin-ah zirlai 1 chu zirtirtu 6 in an vil a, Sethawn-ah zirlai 4 chu zirtirtu 7-in an zirtir bawk a. Kolasib district a hetiang dinhmuna awmte hi upper primary school (SSA enkawl) vek an ni a. Zirtirtu leh zirlai inzat awmna sikul a awm lo thung. Aizawl district-ah chuan Chhanchhuahna Khawpui upper primary school (SSA)-ah zirlai awm lovin zirtirtu 3 an awm a, Hermon middle school (SSA)-ah zirlai awm lovin zirtirtu 1 a awm a. Government Hlimen middle school-ah zirtirtu leh zirlai 7 ve ve awmin Tuikhurhlu-ah pawh zirlai leh zirtirtu 5 ve ve an awm a ni. Khawzawl district-ah chuan Khualen upper primary school (SSA)-ah zirlai leh zirtirtu 6 ve ve an awm.

Serchhip district-ah Buhkangkawn middle school (SSA)-ah zirlai 3 awmin zirtirtu 5 an awm a, govt. midland comprehensive school-ah zirlai 4 awmin zirtirtu 7-in an zirtir a ni. Saitual district-ah Dilkhan upper primary school (SSA) chuan zirlai leh zirtirtu panga ve ve a nei bawk.

<><><>

MYANMAR REFUGEES

Champhai District-a Farkawn khua a tlawmngai pawl hrang hrang hruaitute, nimina thukhawm chuan Farkawn khaw chhunga raltlanin dawr an neih an khap.

Farkawn VC kaihhruaina hnuaia pawl hrang hrang rorel inkhawm Farkawn khaw chhunga raltlan dawr nei mekte chu May ni 31 ral hmangei a an bungruate tiral vek turin thuchhuah an siam a. Farkawn VCP Pu R. Lawmzuala hnen atanga thu dawn danin Farkawn khaw chhunga raltlan dawr leh bungruate hi mipui te'n kharchhawn leh khulsak phal a ni lova, an mahni-in a tihral dan an ngaihtuah ang an tih bakah Raltlan lut leh chhuak tur reng rengin mahni thu a lut leh chhuak lovin Village Level Committee on Myanmar Refugees (VLCMR) -ah in report zel tur a ni an ti bawk.

He tih lai hian he huna kalkhawmte hian Farkawn khaw kianga Lurh tlangah ramngaw leh nungchate humhalhna atan Vavu Sanctuary siam tum a nih thu an tarlang a. Lurh tlang leh a chhehvel ramah Silai kenga ramvah khap tlat a ni a, Thingro pawh lak khap a ni. Vavu Sanctuary atana Lurh Tlang ram an dah chu hun lo kal zel turah pawh sorkar leh department kuta hlan phal a ni lovang an ti bawk.

<><><>

DISASTER RELIEF

Nikum May ni 27 leh ni 28 a Cyclone Remal avanga chhiatna nasa tak tuartute tan Mizoram sorkar chuan cheng vaibelchhe 46 leh nuai 40 a pe chhuak.

Tun hnai a Disaster management & rehabilitation minister Pu K. Sapdanga'n tunhnai a assembly house chhunga zawhna a chhan danin Cyclone Remal-in nikum May ni 27 leh ni 28 a Mizoram hmun hrang hranga chhhiatna a thlen avang khan Finance Commission 15-na in State Disaster Response Fund (SDRF) a ruahmansak atang khan cheng vaibelchhe 46 leh nuai 40 chu a tul anga hman tura pek chhuah a ni a. He ta tanga cheng vaibelchhe 5 leh nuai 17 chu thlichhia tlehin in a tihchhiat neitute tanpuina atan district disaster management authority (DDMA) tinah sem a ni a, cheng vaibelchhe 1 leh nuai 80 chu leimin leh in chim thenfaina senso atan DDMA-te hnenah sem a ni bawk a. A la bang zawng chu department 9 hnenah pek chhuah a ni.

Department zingah hian PWD-in SDRF sum hi an dawng hnem ber a. Leiminin kawng a hnawh leh in chimte thawm thatna atan cheng vaibelchhe 13 an dawng a. Power & electricity department chuan kawlpheha semchhuahna hrui leh ban chhiate leh khawl hrang hrang chhiate thawm that na'n cheng vaibelchhe 10 leh nuai 20 an dawng a. PHE in tui pipe leh tui pump chhuahna khawl chhia leh thil dang dang atan cheng vaibelchhe 4 leh nuai 27 an dawng a. Sikul leh an department in chhiate thawmthatna atan school education department chuan SDRF sum hi cheng vaibelchhe 3 leh nuai 79 an dawng a ni. SDRF sum dawngtu

dangte chu irrigation & water resources, horticulture, agriculture, health & family welfare and fisheries department te an ni. Cyclone Remal avanga chhiatna thleng leh a kaihhnawihah mi 34 an thi a. Thi te hi Melthum, Hlimen, Salem veng te bakah Falkawn Lungsei, Kelsih leh Aibawk khaw mite an ni a. Kha thlichhe tleh khan mihring nunna a lak bakah in leh lo, huan leh sorkar leh mimal bungraw tam tak a tichhia a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

DRUGS SEIZED

Narcotics Control Bureau (NCB)-in Imphal leh Guwahati zone-ah Methamphetamine, cheng vbch 88 hu an man a, a neitu nia puh mi 4 an man bawk.

Union Home Minister Amit Shah chuan NCB hlawhtlinna chu fakawm a tih thu sawiin hetiang ang zat ruihhlo man thei tura an thawhrimna chu a chhunawm tak zet a ni, a ti a, Prime Minister Narendra Modi-a kaihhruai sorkarin ruihhlo awm lohna ram siam a tum thu a tarlang nawn bawk.

Home Ministry sawi danin, tun thla ni 13 khan NCB team-in Imphal Zone-ah Methamphetamine mum Kg 102 chuang an man a, Guwahati Zone-ah Kg 8 vel an man bawk a, ruihhlo tawlh ruknaa inhnawih dangte zawn hna thawh zui mek a ni.

<><><>

MACEDONIA NIGHTCLUB FIRE

North Macedonia rama tukin khawvar hma deuha zan lam intihhlamna hmuna kangmei nasa tak chhuakah mi 51 an thi a, midang 100 chuangin hliam an tuar bawk.

Vanduaina hi Kocani (Kokani) khawpuia thleng a ni a, club-ah hian an rama zaithiam lar tak, DNK band-in concert neiin mi 1500 velin an en nia sawi a ni a, halmawi hal atanga kangmei hi chhuak tan niin Interior Minister-in a sawi a ni.

<><><>

MYANMAR AIRSTRIKE

Myanmar sipai-ten thlawhna atanga democracy thlawptu hel pawl awp khua an kahnaah civil mi 27 aia tlemlo an thi a, an zingah hian naupang 6 an tel a ni.

Mandalay People's Defence Force thupuangtu sawi danin, sipaite hian nizan khan Singu township-a Let Pan Hla khua hi an kap a, mi 30 velin hliam an tuar bawk a ni.

Myanmar eptu pawl lian ber thlawptu, Mandalay People's Defence Force hian Singu hi nikum July thla khan an la a, sipai sorkar chuan an lakah nasa zawkin beihpui a thlak a ni.

<><><>